


後664.01  
836

Kodak Color Control Patches



元遺山年譜序

遺山先生金亡不仕幾三十年其舊都之感故君之思  
幽憂慷慨之端悱惻纏綿之故不可明言者悉寓之於  
詩顧其詩集分體而不編年其出處又皆散見于他書  
閱之者但獵取其辭華剽襲其體格而已究未能得其  
寓托之所在也乾隆四十六年辛丑歲客居揚州讀先  
生之詩而愛之展卷之際身世漠不相關古今渺不相  
接然而其情之可以移人者常一往而不可窮其誠之  
可以動物者每三復而不能置茫茫然而來怦怦焉欲  
動不自知其何心也既而取金史本傳及文集排比而

元遺山先生年譜

函 1 冊 書號 11312

類次之尋先生所遭之時與先生所處之境而後先生之出處本末有所考庶幾先生之詩之命意有所窺蓋其天懷之所感激偶於一物焉而伸之其孤憤之所鬱結偶于一事焉而發之身處於元而心在乎金言盡乎此而意繫乎彼細而案之隨處皆舊都之感故君之思也始知向之相賞於辭華體格間者爲已淺矣然先生出處本末天興甲午以前雖具金史本傳而自乙未以至丁巳往來於齊魯燕趙晉魏之間行踪靡定本傳及陵川墓銘皆未之詳蒐緝亦殊不易也於是仿魯氏之於少陵施氏之於東坡之例以年爲經以詩緯之爲先

生年譜一書癸卯在京師曾以草創質翁覃漢師師甚喜曰昔者亦擬爲此今得子書余可以不作矣子其勉旃嗣以牽於俗累稿凡累易終未成書及就官甯國稍得暇乃取舊稿并雜採金元史中州集歸潛志元文類泊金元人文集撰著之鉤稽校勘釐爲二卷以仕金時事爲上卷北渡後事爲下卷其可考者錄之其不可考者缺之後人議論之誣考證之疏者則爲辨之至于其詩之寄託之所在則未臆解聊自附于季卿元之之後惜道遠不獲就正於吾師也嘉慶元年歲在丙辰十一月朔歛凌廷堪序

元遺山先生年譜卷上

欽凌廷堪編



金章宗明昌元年庚戌先生生

生七月出繼叔父格

先生南冠錄引予以始生之七月出繼叔氏隴城  
府君迨大安庚午府君卒官扶護還鄉里時年二  
十有一矣

廷堪案先生以始生七月出繼叔氏中州集  
所謂先大夫字德明號東巖者先生本生父  
也郝經陵川集遺山先生墓銘所謂父格顯

武將軍兼行隴城令者卽叔氏隴城府君也  
故先生集中爲第四女配婿祭家廟文稱德  
明爲顯伯考贈中順大夫東巖府君稱格爲  
顯考廣威隴城府君金史本傳據中州集謂  
德明爲先生父但失載出繼一事耳至金詩  
紀事則案中州集楊叔玉墓銘云先生姓元  
氏字德明好問不敢名父故云爾金史中不  
爲詳著漫從中州集所載亦以字書失實甚  
矣山西舊志中每有金人元格詩始知德明  
名格也竟以格與德明合爲一人較金史又

誤夫格爲隴城令德明隱居繫舟山不仕出  
處判然何不考之甚耶郭元鈺全金詩亦以  
德明爲卽元格今悉正之

又案大安庚午衛紹王卽位之二年也上距  
章宗明昌元年庚戌凡二十一年故知先生  
以明昌庚戌生也慎言補後倣此

二年辛亥二歲

三年壬子三歲

四年癸丑四歲

始讀書

先生南冠錄引予自四歲讀書八歲學作詩今四十年矣

五年甲寅五歲

從父格官掖縣

廷堪案先生濟南行記云予兒童時從先隴城府君官掖縣嘗過濟南又濟南雜詩云兒時曾過濟南城暗算存亡只自驚四十二年彈指過只疑行處是前生再遊濟南在乙未七月則知格官掖縣時先生方五歲也

六年乙卯六歲

承安元年丙辰七歲

能詩

郝經先生墓銘先生七歲能詩太原王湯臣稱神童

二年丁巳八歲

學作詩

先生南冠錄引八歲學作詩

廷堪案墓銘作七歲能詩與此異南冠錄引為先生自叙必不誤

三年戊午九歲

元遺山先生年譜 卷一  
四年己未十歲

五年庚申十一歲

從父格官於冀州

郝經先生墓銘年十一從其叔父官於冀州學士

路宣叔賞其俊爽教之爲文

泰和元年辛酉十二歲

二年壬戌十三歲

三年癸亥十四歲

從父格官陵川受業郝天挺之門

郝經先生墓銘年十有四其叔父爲陵川令從先

### 大父學

金史隱逸傳郝天挺字晉卿澤州陵川人大原元

好問嘗從學進士業貞祐中居河南耿耿自信寧

困窮終不一至豪富之門年五十終於舞陽

元史郝經傳經字伯常其先潞州人徙澤之陵川

祖天挺元裕常從之學金亡經往來燕趙間元裕

每語之曰子貌類汝祖才器非常勉之世祖元年

以翰林侍讀學士使宋館真州伯顏南伐宋懼以

禮送歸明年卒謚文忠

延堪案元史所稱元裕卽先生也初疑先

元遺山先生年譜 卷一  
字裕之修史者採諸舊書成於倉卒誤脫之  
字故趙復等傳又有元好問竟若兩人後者  
張德輝等傳元裕之稱屢見豈先生北渡後  
或改名爲裕歟未可定以爲史誤也

四年甲子十五歲

學爲時文

先生古意詩七歲入小學十五學時文

五年乙丑十六歲

本生父德明卒

先生中州集先人捐館後十年好問避兵南渡游

道日廣世始知有元東巖詩

廷堪案貞祐二年五月遷都南京是年爲甲

戌先生避兵南渡河年二十有五則前十年

先生十六歲

六年丙寅十七歲

七年丁卯十八歲

父格教之民政由陵川還秀容

先生南冠錄引十八先府君教之民政從仕十年

出死以爲民

又忻州天慶觀重建功德記曩余嬰年先大夫挈



之四方十八始一歸

慎言補

八年戊辰十九歲

衛紹王大安元年己巳二十歲

秋試留長安是年長女真生

先生送秦中諸人引子年二十許時侍先人官洛陽以秋試留長安中

郝經先生墓銘女五人長曰真適進士東勝程思

温

廷堪案先生古意詩云七歲入小學十五學時文二十學業成隨計入咸秦秦中多貴遊

幾與書生親年年抱關吏空笑西來頻則先生是年蓋報罷也又示程孫詩云生女四十年今爲有父樂又云明年吾六十家事斷關白則知真生先生年方二十也

二年庚午二十一歲

父格卒官隴城先生扶護還秀容

先生南冠錄引大安庚午府君卒方二三年間中原受兵避寇陽曲秀容之間歲無寧居

廷堪案先生所謂寇者蓋指元兵也南冠錄作於羈管聊城之歲是時金源已亾而先生

稱謂如此其西山之節可見矣顧嗣立秀野草堂元人百家詩選乃列先生於元人之首殆亦未綜其本末而深考之耳

三年辛未二十二歲

住太原學舍與吳庭芳庭俊結夏課于由義齋慎言補

先生十七史蒙求序始余年二十餘住太原學舍

交城吳君庭芳洎其弟庭俊與余結夏課于由義

齋慎言補

崇慶元年壬申二十三歲

廷堪案先生兩山行記予年二十許時自燕

都試與客登南樓者當在此一二年間

至寧元年癸酉二十四歲

廷堪案是年八月癸巳紇石烈執中弑衛紹

王九月甲辰宣宗即位壬子改元貞祐

宣宗貞祐二年甲戌二十五歲

蒙古兵屠城先生兄好古遇害先生避兵南渡河

先生敏之兄墓銘兄字敏之諱好古歿於貞祐二

年三月北兵屠城之禍年二十九矣

又答聰上人書僕自貞祐甲戌南渡河時犬馬之

齒二十有五

延堪案是年五月宣宗遷都南京卽宋之汴京也

三年乙亥二十六歲

延堪案是年五月蒙古兵破中都先生西園詩哀中都之破而作也

四年丙子二十七歲

忻州被兵奉母張夫人南渡河寓居福昌縣之三鄉鎮十月蒙古兵破潼關避兵於女几山

先生故物譜貞祐丙子之兵藏書屋壁間得存兵退奉先夫人南渡河舉而付之太原親舊家自餘

雜書及先人手寫春秋三史莊子文選之等尚干餘冊并畫百軸載二鹿車自隨三研則瘞之鄭村別墅是歲寓居三鄉其十月北兵破潼關避兵於女几山之三潭比下山則焚蕩之餘蓋無幾矣先生虞坂行自注丙子夏將南渡河道出虞坂感而有作

又孫伯英墓銘貞祐丙子予自太原南渡故人劉昂霄景元愛伯英亦予與之交

延堪案答聰上人書作甲戌南渡河此又云丙子南渡河二者恐有一誤

又案墓銘稱先生妣河南縣君張氏蓋隴城公之配也金史南京路嵩州福昌縣有女儿山又有三鄉鎮卽先生避地所居也本集有女几山避兵送李長源歸關中詩又湧金亭示同遊諸君及嘯臺感遇詩皆當作于是年湧金亭詩中云我從汾晉來山之面目腹背皆經過濟源盤谷非不佳煙景獨覺蘇門多語氣亦是踰太行而南初入懷衛光景癸卯在京師大興翁覃溪師以此詩石刻見示中唯空青斷石壁微茫散煙螺與集中作散煙

蘿者異餘皆同書法頗類虞永興是知先生亦善書也

興定元年丁丑二十八歲

在三鄉作錦機以詩文見禮部尚書趙秉文

先生錦機引興定丁丑居河南始集前人議論爲

一編

又趙閒閒眞贊興定初始以詩文見故禮部閒閒公公若以爲可教爲延譽諸公間又五年仍得以科第出公之門

金史趙秉文傳趙秉文字周臣大定二十五年進

士拜禮部尚書卒年七十四

廷堪案本集有論詩七絕三十首自注云丁丑歲三鄉作又龍門雜詩五古二首第二首中云學詩二十年鈍筆死不神先生南冠錄引云八歲學作詩則作龍門雜詩時年二十八亦當在丁丑也集中木庵集序云木庵貞祐初南渡河居洛西三鄉時有辛敬之趙宜之劉景元子亦在焉三君子皆詩人上人與相往還又云上人住龍門崧少二十年則龍門雜詩蓋赴木庵之招而作也故詩首云不

見木庵師胸中滿泥塵西窗一握手大笑傾冠巾也至三鄉時作七絕云菽水奉親吾豈敢老親自愛齋羹甜其作在丙子與丁丑則不可知矣慎言補

二年戊寅二十九歲

三年己卯三十歲

第三女阿秀生

先生孝女阿秀墓銘孝女阿秀奉直大夫尚書省令史元好問第三女也興定己卯生於登封

廷堪案墓銘載先生女五人長曰真適進士

東勝程思溫次嚴女冠詔爲宮教號浯溪真  
隱次順早卒次適成和郎大都惠民司提點  
太原翟國才次適建德路織染局大使定襄  
霍繼祖考孝女阿秀年十三以開興壬辰三  
月朔死與墓銘所謂次順早卒者合則阿秀  
當名順郭元鈺金全詩云三女順集中有示  
女珍詩珠圍翠繞三花樹李白桃紅一捻春  
看取元家第三女他年真作魏夫人順當作  
珍四女名柔則阿秀又名珍矣元蔣正子山  
房隨筆稱先生有妹爲女冠能詩先生之妹  
爲女冠無可考或恐因女嚴爲女冠而致誤  
耳

四年庚辰三十一歲

與李獻能李純甫雷希顏同遊玉華谷

先生本集西園詩自注云興定庚辰八月作

又同希顏欽叔玉華谷分韻得軍華二字二首

又同希顏欽叔玉華谷還會善寺卽事二首

李純甫題古仙人辭後興定庚辰予與元好問趙

郡李獻能同遊玉華谷

雷淵古仙人詩跋興定庚辰夏六月望予與元好

問趙郡李獻能同遊玉華谷

**金史文藝傳**李獻能字欽叔河中人苦學博覽于文貞祐三年進士廷試第一人授應奉翰林文字出爲鄜州觀察判官復爲應奉俄遷修撰正大末以鎮南軍節度使充河中帥府經歷元兵破河中奔陝州行省以權左右司郎中值趙三三軍變遇害年四十三

**劉祁歸潛志**欽叔爲人渺小而黑頗有髯善談論每敷說古今聲鏗亮可聽作詩有志於風雅又刻意樂章嘗謂人曰吾幼夢官至五品壽不至五十

竟如其言異哉

先生中州集屏山先生李純甫

**金史文藝傳**李純甫字之純宏州襄陰人擢承安二年經義進士章宗南征兩上疏策勝負上奇之薦入翰林元兵起論時事不報正大末改京兆府判官卒于汴

**歸潛志**李翰林純甫雖沉醉未嘗廢著書至於談笑怒罵粲然皆成文理天資喜士後進有一善極口稱推一時名士皆由公顯于世每酒酣歷歷論天下或談儒釋異同雖環而攻之莫能屈世豈復

云邊山先生集卷四  
有此俊傑人哉

又雷翰林淵字希顏一字季默應州渾源人幼以  
孤童入大學讀書晝夜不休從李屏山遊遂知名  
俄中高第調涇州錄事後改東平遷東阿令授徐  
州觀察判官興定末召爲英王府文學俄入翰林  
爲應奉拜監察御史彈劾不避權貴爲小人所訟  
罷去起爲太學博士南京轉運司戶籍判官遷翰  
林脩撰一夕暴卒年四十八公博學有雄氣爲文  
章專法昌黎善叙事詩雜坡谷喜新奇

廷堪案金初之文皆遼宋故習大定明昌中

趙周臣李之純楊之美始振興之至宣宗南  
渡雷希顏李欽叔宋飛卿冀京父李長源王  
仲澤麻知幾辛敬之王飛伯諸人出始爲極  
盛故歸潛志云泰和太安以來科舉之文敝  
蓋有司惟守格法無育材心文風益衰及宣  
宗南渡貞祐初趙閒閒爲省試有司得李欽  
叔賦大愛之擢爲第一又擢麻知幾爲策論  
魁于是舉子輩譁然俄欽叔中宏詞科入翰  
林衆始厭服正大中欽叔爲省試有司得史  
學優賦大愛之亦擢第一于是舉子輩復大



課俄學優對廷策中之議者亦息又云南渡後文風一變文多學奇古詩多學風雅由趙閒閒李屏山倡之故能一掃遼宋餘習而雷希顏宋飛卿諸人皆作古文趙閒閒晚年詩多法唐人李杜諸公已而麻知幾李長源元裕之輩鼎出故後進作詩者爭以唐人為法也先生自貞祐初南渡河與諸鉅公遊得師友之益日多故能鬱為一代宗工蓋先生之生實閒氣所鍾集金之大成開元之先聲以主持數百年文章氣運非偶然也集中有李

屏山挽章二首趙閒閒真贊四哀詩諸作益以見先生師友之誼甚摯云四哀詩者李欽叔冀京父李長源王仲澤也欽叔即獻能京父中州集云冀禹錫字京父龍山人崇慶二年進士正大中奏充知事官奴之變乃自投水中歸潛志云京父值蒲察官奴之變與宰相李蹊同見殺年四十三與中州集異長源金史文藝傳云李汾字長源平晉人為入尚氣喜讀史工詩元光間舉進士不第去客唐鄧間恒山公武仙署為行省講議官既而仙

與參知政事完顏思烈相異同懼汾欲除之  
汾遁泌陽仙追獲之絕食而死年未四十歸  
潛志云為仙麾下所殺與史異仲澤中州集  
云王渥字仲澤以字行興定二年進士正大  
七年朝廷與宋人講和擇可為行人者仲澤  
以才選凡再至揚州制司宋人愛其才有中  
州豪士之目八年權右司郎中中牟失利不  
知所終歸潛志云天興改元渥從赤蓋合喜  
兵援武仙鄭州西遇北兵大戰歿于陣亦與  
中州集異

五年辛巳三十二歲

登進第座主趙秉文

金史本傳中興定五年第

郝經先生墓銘登興定五年進士第不就選

廷堪案先生閒閒公墓銘云公之葬也孤子

似以好問公門下士來速銘又有野菊座主

閒閒公命作詩

元光元年壬午三十三歲

二年癸未三十四歲

往來箕頴間與馮璧雷淵李治劉從益李獻能麻九

疇張毅辛愿李汾王鬱劉光謙白華史學諸人爲友  
有緱山置酒潁亭留別鴻溝等詩

先生真定府學教授常君墓銘元光癸未予過鄆  
城見麻徵君知幾

又葉縣中岳廟記癸未之夏余過昆陽

廷堪案郝伯常所謂往來箕潁大放厥辭應  
在此時歸潛志云余先子翰林令葉時同坊  
州郝仲純賦昆陽懷古詩諸公多繼作先子  
有云營屯渚水橫陳處計墮劉郎小怯中天  
上雷風掃妖氣人間虎豹畏真龍千秋一片

昆溪月曾照堂堂蓋世雄郝云戰骨至今埋  
渚水暮雲何處是春陵李長源云潁川南下  
鬱陂陔遐想當年戰壘多自是真人清宇宙  
誰爲豎子試干戈元裕之云英風未覺消沉  
盡試向春陵望鬱葱王飛伯云落日一川英  
氣在西風萬葉戰聲來後云誰倚城樓弔興  
廢一聲長笛暮雲開李欽叔白文舉史學優  
皆有詩余亦作一古詩也考先生中岳廟記  
云癸未過昆陽則作詩當在是年再考志所  
稱先子翰林者卽劉從益也從益爲京叔之

父字雲卿渾源人大安元年進士有蓬門集  
見金史文藝傳馮璧字叔獻真定人永安二  
年經義進士雷淵已見前李治字仁卿樂城  
人登金進士第元至元二年以學士召就職  
麻九疇字知幾易州人正大初特賜進士張  
穀字伯玉許州人伯英之弟辛愿字敬之福  
昌人不仕王鬱字飛伯大興人劉光謙字達  
卿潘州人泰和三年進士白華字文舉澳州  
人貞祐三年進士天興二年叛降宋史學字  
學優河南人正大中進士以上並見金史中

州集歸潛志元史諸書

哀宗正大元年甲申三十五歲

五月試詞科程文為章宗皇帝鐵券行引秦王擒竇  
建德降王世充露布光武中興頌大司農箴

先生趙閒閒真贊正大甲申諸公貢某詞科公為  
監試官以例不赴院宿一旦坐禮曹欽叔從外至  
讀子秦王破竇建德降王世充露布公頗為聳動  
顧座客陳正叔言人言我黨元子誠黨之耶

廷堪案野菊詩當作于是年歸潛志云正大  
初趙閒閒長翰林院同陳正叔潘仲明雷希

顏元裕之諸人作詩會嘗賦野菊趙有云岡  
斷秋光隔河明月影交荒叢號蟋蟀病葉掛  
蠨蛸欲訪陶彭澤柴門何處敲諸公稱其破  
的也今考先生有野菊座主閒閒公命作及  
野菊再奉座主閒閒公命作二詩皆七言律  
見集中

二年乙酉三十六歲

在京師權國史院編修夏還居嵩山作杜詩學

先生吏部椽屬題名記正大二年五月日儒林郎  
權國史院編修官元某記警巡廳署記同

又杜詩學引乙酉之夏自京師還閒居嵩山因錄  
先君子所教與聞之師友之間者為一書名曰杜  
詩學子美之傳誌年譜及唐以來論子美者在焉  
六月十一日河南元某引

廷堪案歸潛志云元裕之李長源同鄉里各  
有詩名由其不相下頗不相成李好忿怒元  
嘗云長源有憤擊經元好滑稽李輒以詩譏  
罵元亦無如之何元嘗權國史編修官時末  
帝召故駙馬都尉僕散阿海女子入宮俄以  
人言其罪又蒙放出元因賦金谷怨樂府詩

李見之作代金谷佳人答一篇以拒焉一時  
士人傳以為笑談元詩云娃兒十八嬌可憐  
亭亭嬈嬈春風前天上仙人玉為骨人間畫  
工畫不出小小油壁車軋軋出東華繡帶盤  
綾結雲裾踏雁沙嬌雲一片不成雨被風吹  
去落誰家豈無年少恩澤侯錦韞貂帽亦風  
流不然典取鸚鵡裘四壁相如堪白頭金谷  
樓臺杳無主燕子不飛花著雨只知環珮作  
離聲誰解琵琶得私語有情蜂雄蛺蝶雌無  
情鷄欺翡翠兒勸君滿飲金屈卮明日無花

空折枝李詩云石家園林洛水濱粉垣碧瓦  
迷天津樓臺參差映金谷歌舞日日嬌青春  
是時天下甲兵息江南已傳歸命臣永平以  
來本康治四海一家無窮人洛陽城中厭酺  
釀司隸夜過不敢噴王門戚里事豪侈車馬  
如水爭紅塵燒金砍玉延上客季倫豈輸趙  
王倫兩家炎炎貴相軋笙竽嘈嘈妓成列珊  
瑚紅樹鞭擊碎步障青絲馬踏裂因緣睚眦  
貴人怒詔下黃門促收捕郵夫防吏急喧驅  
河南牒繫御史府鐘鳴漏盡行不休生存華

屋歸山邱。緣珠香魂。浣塵土。侍兒忍居樓上頭。君王慈明宥率土。妾身竄居藉民伍。平生作得健兒婦。狗走鷄飛豈敢惡。元和其詩先子稱工考先生以乙酉權國史院編脩次年除鎮平令則是詩作于乙酉可知志所謂末帝蓋哀宗也再考金史李長源元光間舉進士不中用薦為史館書寫時趙閒閒為翰林雷希顏李欽叔皆在院長源不下之諸公怒將逐去當在此時而先生獨不以為忤長源被害為詩以哀之復編其詩於中州集始終

懇懇亦可見其友誼之篤矣長源此詩中州集全金詩皆不載先生詩亦與集多異

三年丙戌三十七歲

除鎮平令

郝經先生墓銘初筮仕除鎮平令

廷堪案郝伯常稱先生初除鎮平令再轉內鄉先生乙酉歲居嵩山丁亥已轉內鄉令則官鎮平時在丙戌集中詩凡題鎮平者皆丙戌作也時先生年三十七而鎮平書齋感懷七律首句云四十頭顱半白生舉成數而言

也其鎮平書事七絕云勸農冠蓋已歸休了  
却逋懸百不憂可是諸人哀老子半窗紅日  
擁黃紬則先生之優於政事而得民心可見  
矣慎言補

四年丁亥三十八歲

轉內鄉令

先生長慶新泉記鄧之西百里而遠是爲內鄉之  
東鄙有山焉其麓二泉灌田千畝有奇今以地名  
之長慶泉正大丁亥余承乏是邑

五年戊子三十九歲

在內鄉營長壽新居

先生行齋賦序戊子冬十月長壽新居成仲經張  
君從余卜鄰

又張仲經詩集序及子官西南仲經偕麻信之高  
信卿康仲寧挈家就子內鄉

又長壽新居詩三首自注云宣和中姜夢得處士  
常隱于此墓碣在焉夢得會上書仁宗朝旣老以  
詩酒自娛碣文說地名白鹿原長壽邨也

延堪案先生移居詩云新齋浙江曲山水窮  
放浪則長壽地在浙江隈也浙水在內鄉境



內故先生讀書山中詩第二首云我在正大  
初作吏浙江邊集中有觀浙江漲詩亦當作  
于是年之夏秋也又有戊子正月晦日內鄉  
西城遊眺詩皆在新居未營之前中州集張  
參議澄字之純別字仲經本出遼東烏惹族  
國初遷之隆安

六年己丑四十歲

子阿干生作東坡詩雅丁母張夫人憂居內鄉白鹿  
原構新齋于菊水上讀書其間

先生子阿干始生詩四十舉兒子提孩聊自誇

又東坡詩雅引作東坡詩雅目錄一篇正大己丑

河南元某書于內鄉劉鄧州光父之東齋

郝經先生墓銘再轉內鄉遂丁艱憂

先生行齋賦序子旣罷內鄉出居縣東南白鹿原  
結茅菊水之上聚書而讀之

廷堪案墓銘載先生子男三人長曰撫奉直  
大夫汝州知州兼管諸軍奧魯勸農事次曰  
振大原路參佐次曰搃尚書都省監印繹詩  
意則阿干當屬先生長子撫也

又案墓銘終喪辟南陽令考先生令南陽歲

在辛卯則居喪當在己庚間慎言補

七年庚寅四十一歲

居喪劉祖謙辟爲從事不就

先生中州集劉鄧州祖謙字光甫安邑人承安五年進士正大中除武勝軍節度副使慎言補

又竹林禪院記正大庚寅子間居空空廣因進士康國仲寧以記請因爲記其事四月望日前內鄉令元某記

廷堪案集中有謝鄧州師免從事之辟詩云憂端擾擾力難任世事駸駸日見臨三載素

冠容有愧一時墨經果何心首邱自擬終殘喘陟岵誰當辨苦音遙望朱門涕橫落相公恩德九原深蓋先生不忍爲奪情之舉也

八年辛卯四十二歲

終喪辟南陽令配張氏病歿

郝經先生墓銘終喪正大中辟中州南陽令南縣大縣兵民十餘萬帥府令兼鎮撫甚有威惠

先生孝女阿秀墓銘年十三余爲南陽令其母張病歿孝女日夜哭泣明年得病于汴梁

廷堪案集中有京居辛卯八月六日作當是

終喪赴京之詩又宛邱嘆自注髯李令南陽後十年予爲此縣辛卯七月農司檄予按秦陂田知先生官南陽在辛卯也金史先生本傳興定五年第歷內鄉令正大中爲南陽令此其在外歷官之次而郝伯常先生墓銘云正大中辟鄧州南陽令帥府令兼鎮撫本作府甚有威惠以大夫人衰疾辭劇致養轉內鄉令丁艱憂是以令內鄉爲在令南陽之後與史不合考先生爲竹林禪院記在正大庚寅署云前內鄉令元某核之宛邱嘆自注則其

歷官先後金史所記爲得其實矣

金史以下慎言補

又案先生鄧州新倉記作于正大八年之四月末署云儒林郎內鄉縣令武騎尉賜緋魚袋元某記

天興元年壬辰四十三歲

在京師官東曹掾吏部主事冬哀宗將東狩先生言於時相請以小字國史一本隨駕未及行是年三月女阿秀死

先生鎮南軍節度使良佐碑天興元年六月故禦侮中郎將陳和尚死節事聞詔擇文臣相與往來

者為褒忠廟碑宰相以東曹椽吏部主事臣某應  
詔

又南冠錄引京城之圍予為東曹都事知舟師將  
有東狩之役言於諸相請以小字書國史一本隨  
車駕所在以一馬負之時相以為然而不及行也

又趙開開真贊壬辰冬某以東曹椽知雜權都司  
取行止卷觀之見公獨銜及楊雷猥相薦引者十  
七章

又阿秀墓銘以開興壬辰三月朔死

廷堪案是年正月改元開興四月改元天興

十二月哀宗出奔河北蒙古速不臺圍南京  
先生集中有壬辰十二月車駕東狩後即事  
五首之作

又案墓銘云終喪詔為尚書都省椽蓋以先  
生令內鄉在辟鄧州南陽令之後也金史先  
生本傳天興初擢尚書省椽頃之除左司都  
事轉行尚書省左司員外郎金亡不仕而墓  
志繫為尚書都省椽于正大時天興初則云  
入翰林知制誥皆與史異考歸潛志自記辭  
撰崔立碑事稱裕之為翰林諸公則先生

爾時實入翰林但金史失載耳慎言補

二年癸巳四十四歲

蒙古速不臺圍城甚急時先生爲左司都事白留守完顏奴申及副樞完顏習捏阿不欲立二王監國效春秋紀季入齊之義以全兩宮及皇族議未決明日西面元帥崔立反殺奴申阿不以太后令立衛王子從恪爲梁王監國以先生爲左右司員外郎立自稱鄭王遂送款蒙古脅百官父老立碑頌功德劫太學劉祁撰文磨甘露碑刻之四月先生至青城五月北渡

金史完顏奴申傳天興二年正月戊辰省令史許安國詣講議所言古者有大疑謀及卿士謀及庶人今事勢如此可集百官及僧道士庶問計左都事元好問以安國之言白奴申奴申曰此論甚佳可與副樞議之副樞亦以安國之言爲然好問曰自車駕出京今二十日許又遣使迎兩宮民間洵洵皆謂國家欲棄京城相公何以處之阿不曰吾二人惟有一死耳好問曰死不難誠能安社稷救生靈死而可也如其不然徒以一身飽五十紅衲軍亦謂之死耶阿不款語曰今日惟吾二人何言

不可好問曰聞中外人言欲立二王監國以全兩宮與皇族耳阿不曰我知之矣我知之矣卽召京城官民明日皆聚省中諭以事勢危急當如之何有父老七人陳詞云云二人命好問受其詞白之奴申顧曰亦爲此事也且問副樞此事謀議今幾日矣阿不屈指曰七日矣奴申曰歸德使未去慎勿泄或曰是時外國不解如在陷阱議者欲推立荆王以城出降是亦春秋紀季入齊之義况北兵中已有曹王也奴申拱立無語獨阿不反覆申諭且繼以弟泣明日崔立與其黨遂爲變

又哀宗紀天興二年正月戊辰安平都尉京城西面元帥崔立舉兵爲亂殺參知政事完顏奴申樞密副使完顏斜捨阿不勒兵入見太后立衛王子從恪爲梁王監國自稱左丞相都元帥尚書令鄭王弟倚平章政事侃殿前都點檢其黨字木魯長河御史中丞韓鐸副元帥兼知開封府折希顏藥安國等並元帥師肅左右司郎中賈良兵部郎中兼右司都事又署工部尚書溫迪罕二十吏部侍郎劉仲周並爲參知政事宣徽使奧屯舜卿爲尚書左丞戶部侍郎張正倫爲尚書右丞左右司都

事張節爲左右司郎中尚書省掾元好問爲左右  
司員外郎都轉運知事王天祺懷州同知康瑒並  
爲左右司都事遂送欵大元軍前癸酉元將碎不  
解進兵汴京四月癸巳崔立以梁王從恪荆王守  
純及諸宗室男女五百餘人至青城皆及于難甲  
午兩宮北遷

又崔立傳二相遇害立以王太后誥命梁王監國  
凡除拜皆以監國爲辭

歸潛志錄崔立碑事云崔立旣變以南京降自負  
其救生靈功謂左司員外郎元裕之曰汝等何時  
立一石書吾反狀耶時立國柄入手生殺在一言  
省廷日流血上下震悚諸在位者畏之于是乎有  
立碑頌功德議數日復召余不知何謂往至省門  
週麻信之卽同入見張信之元裕之曰鄭王功德  
父老欲立碑紀事衆議屬之二君余曰翰林諸公  
如王丈從之及裕之輩在初等不敢裕之曰此事  
出於衆心君等無讓余趨至學士院見王丈曰此  
實諸公職某等何與焉王曰子未仕在布衣今士  
民屬子爲之亦不傷于義也余于是陰悟諸公自  
以仕金顯達欲避其名以嫁諸布衣又念平生爲

文今遇此患難以是知楊子雲劇秦美新其亦出于不得已耶知不能辭即畧為草定付裕之一二日後召余赴省遇元裕之且拉麻信之俱往止云會飲既入王丈在焉酒數行日將入告歸裕之曰省門已鎖已而燭至裕之曰鄭王碑文今夕可畢手也余曰有諸公在王丈曰子如堅拒鄭王銜之刻骨子有老祖母老母在堂子熟思之余曰余既為草定不當諸公意請改命他人諸公不許余無奈何則曰吾素不知館閣體如諸公避其名但書某名在諸公後于是裕之引紙落筆草其事王丈

又曰此文姑使裕之作以為君作又何妨且君集中不載亦可也余曰裕之作政宜某復何言碑文既成以示王丈及余信之欲相商評王丈為定數字其銘詞則王丈裕之信之及存余舊數言其碑序全裕之筆也然其文止實叙事亦無褒稱立言後數日獻其文遂召余信之等詣立第受官俄齋告身三通付余輩曰特賜進士出身後聞求巨石不得省門左舊有宋徽宗時甘露碑有司取而磨之書刻方畢北兵入城不知其能立否也嗟乎余輩不幸有虛名一旦為人之所劫欲以死拒之則



吾二親何以自存况身未仕祿姑隱忍保身為二親計且其文皆眾筆非余全文彼欲嫁名于余余安得而辭也今天下士議往往知裕之所為上有曹通甫詩楊叔能詞在亦不待余辨也因書其首尾以誌年少之過

廷堪案崔立功德碑事為生平一大疑案今反覆詳考知為劉祁所撰無疑也他不具論歸潛志乃祁所自著之書載撰文始末甚詳其語皆游移無定蓋有愧于中而不自覺其辭之遁也試即其所記而論之其曰以是知

楊子雲劇秦美新出于不得已是以楊雄自解其撰文之慚也其曰欲以死拒則吾二親何以自存是以二親自釋其撰文之罪也其曰知不能辭故畧為草定則已自認不諱矣乃云其文皆眾筆其誰信之其曰齋告身三通付于余輩則已受賞不辭矣乃云諸公欲嫁名又誰信之既以碑序誣先生矣而曰銘詞存余數言則天良益不容盡泯焉既以起草屬先生矣而曰書某名在諸公後則真情或有時一露焉其曰並無褒稱崔立之言夫

諛詞非出已手何煩代爲未減乎况陵川集  
有林希極口吠堯之語爲明徵也其曰王丈  
爲定數字夫惡名已有所歸何事過爲株連  
乎况金史有王若虛以死自誓之文爲左驗  
也良由當時迫立威勢事後物論不容欲辭  
其名難昧其實聊爲此以分已之謗耳易傳  
曰誣善之人其辭游失其守者其辭屈其京  
叔之謂歟金詩紀事未見歸潛志足本乃謂  
受謗不爲無因亦昧于知人論世矣辨詳下  
已亥年

又案是年五月哀宗奔蔡州

又案本集癸巳四月二十九日出京詩云塞  
外初捐宴賜金此言蒙古之初起也當時南  
牧已駸駸此言中都之繼陷也  
只知灞上真兒戲此言武仙鄭州之潰也  
誰謂神州遂陸沉此言崔立汴京之降也  
華表鶴來應有語此言徙百官也  
銅槃人去亦何心此言遷重器也  
興亡誰識天公意留着青城閱古今此  
哀二王之被害兩宮之播越也  
又集中俳體雪香亭雜詠十五首亦應作于是年考金史

地理志南京純和殿正寢也純和西曰雪香  
亭亭北則后妃位也此宮禁嚴密之地是年  
四月崔立二王及宗室至青城故先生得入  
故宮也詩中有云爲向杏園雙燕道營巢何  
處過明年言國都亾將來不知何依也又云  
若爲常得熙春在時上高城望宋州時哀宗  
車駕尚在歸德故曰望宋州至五月始走蔡  
州王阮亭詠元遺山詩落日青山望蔡州者  
誤用此也又云批奏內人輪上直去年名姓  
在窗間哀宗于壬辰十二月出奔河北去此

時僅數月故云去年也又云重來未必春風  
在更爲梨花住少時言將北渡也詩中云暮  
春流鶯亦三四月之交也楊用修藝林伐山  
以爲咏徽宗時事誤不待言金詩紀事正之  
曰遺山集中雪香亭雜詠十五首乃金亾之  
後重過汴宮而作黍離之感觸目興懷白髮  
纍臣自傷故非爲隔代詠也其說當矣然未  
知卽作于癸巳未北渡之前復云重過汴宮  
是于先生詩亦考之未深也  
又集中有癸巳五月三日北渡詩其南冠行

自注亦云癸巳秋為曹得一作則先生北渡

在癸巳歲庶齋老學叢談以為壬辰誤慎言補

又癸巳除夜詩當由青城之聊城所作詩首

云鼎定周元重薪安漢已然蓋追咎金源南

遷之失計也次云不隨南渡馬虛泛北歸船

言汴都亾而為曩臣隨眾北渡也末云更殘

鐘未動猶屬出京年時哀宗尚在言天命之

未改也集中學東坡移居詩云壬辰困重圍

金粟論斗勺明年出青城瞑目就東縛豪釐

脫鬼手攘臂留空橐聊城千里外狼狽何所

託知先于癸巳在青城仍即就道編管于聊

城也除夜詩當作于聊城之寓居移居詩所

云去年住佛屋盡室寄尋丈也

三年甲午四十五歲

羈管聊城作南冠錄

先生清真觀記歲甲午予自大梁羈管聊城

又南冠錄引歲甲午羈管聊城予年已四十有五

殘息淹淹朝夕待盡使一日顛仆于道則世豈復

知有河南元氏哉乃手寫千秋錄一篇付女巖以

備遺亾

延堪案是年正月戊申哀宗在蔡州傳位于東面元帥承麟是為末帝已酉蔡州破哀宗自縊于幽蘭軒末帝被害金亾

又案本集學坡公移居詩八首當作于是年詩第三首首云壬辰困重圍次聯云明年出青城第四首中云去年住佛屋盡室寄尊丈今年僦民居卧榻礙盆盎是先生以癸巳至聊城至甲午乃得編戶僦民居也其密公寶章小集詩自注云甲午三月二十有一日為輔之書于聊城至覺寺之寓居即移居詩所

云住佛屋者蓋在未移居之前也又集中有得姪傳信二首及懷益之兄詩

考南冠錄引甲午歲羈管聊城益之兄邈在襄漢又云姪傳信繫之平陽存亾未知此三

詩疑亦作于是年姪傳宜作侄博先生承奉河南元公墓銘云公諱升

字德清兄隴城府君則升者先生之叔父也又云無子以從孫好謙之子博奉其後字偏旁與先生子撫振摠相同集中詩作傳與墓銘異當從墓銘

又案集中甲午除夕詩暗中人事忽推遷坐守寒灰望復然已恨大官餘麩餅空教漢水入膠船神功聖德三千牘大定明昌五十年

元遺山先生年譜卷下  
甲子兩周今日盡空將衰淚灑吳天此詩首  
句哀金社之已墟次句冀金源之復振三句  
感汴京之被圍四句痛義宗之不返五句言  
禮樂之明備而懼國史之淪亾也六句言章  
廟之澄平而思興陵之德澤也七句紀金世  
享國之數也八句則傷纍臣去國之情也一  
篇之中故君故國之思纏綿悱惻先生真完  
顏氏之忠臣也

元遺山先生年譜卷下

歛凌廷堪編

蒙古太宗七年乙未四十六歲

因故人李輔之約杜仲梁遊濟南

先生濟南行記予兒時嘗過濟南然但能憶其大  
城府而已乙未秋七月始以故人李輔之之故而  
得一至焉

中州集李警院天翼字輔之固安人貞祐二年進  
士汴梁旣下辟濟南漕司從事不與世合竟罹非

一命

延堪案是年爲宋理宗端平二年時蒙古尙  
未有年號

又案本集乙未正月九日立春詩云重碧總  
誇燕市酒小紅誰記上林花是亦旄邱之誕  
節宗周之行邁也仲梁名仁傑全金詩云杜  
仁傑字仲梁一字善夫濟南長清人元時累  
徵不起集中有和仲梁詩又有半山亭招仲  
梁飲詩詩云半山亭前浙江水只可與君消  
百憂蓋在先生官內鄉時事則仲梁爲先生  
舊友先生羈聊城仲梁時家居濟南行記云

初至齊河約杜仲梁俱東蓋先生以書要仲  
梁而仲梁實未至故集中汎舟大明湖詩自  
注云待杜子不至濟南行記亦云還至濟南  
留二日汎大明待杜子不至也行記記所遊  
歷地曰歷下亭曰大明湖曰舜泉曰繡江曰  
華不注山凡十餘處集中如歷下亭懷古舜  
泉繡江汎舟華不注山諸詩皆是時所作不  
獨濟南雜詩也

自集中有和仲梁  
詩以下慎言補

八年丙申四十七歲

客冠氏令趙天錫所馮內翰壁見過偕天錫往泰安

會行臺嚴實因游泰山旋返冠氏作東坡樂府集選  
先生東游紀畧丙申三月二十有一日冠氏趙侯  
將會行臺于泰安侯以予宿尚遊觀拉之偕行  
又贈馮內翰詩序內翰馮丈往在京師日渾源雷  
淵希顏太原王渥仲澤河中李獻能欽叔龍山冀  
禹錫京父皆從之問學某亦得俎豆于門下士之  
末然自辛卯壬辰以來不三四年而五人者唯不  
肖在耳丙申夏六月公自東平將展墓于鎮陽以  
某在冠氏枉駕見過

又東坡樂府集選引丙申九月朔書于陽平寓居  
之東齋

又先生千戶趙侯神道碑銘侯諱天錫字受之姓  
趙氏世爲冠氏人

元史趙天錫傳天錫字受之冠氏人辛巳春歸行  
臺嚴實以功授冠氏令戊戌征宋還卒于冠氏

又嚴實傳實字武叔泰安長清人庚辰七月來歸  
木華黎承制拜實金紫光祿大夫行尚書省事辛  
巳攻東平入居之甲午授東平路行軍萬戶庚子  
卒年五十九中統二年追封魯國公謚武惠

廷堪案金史之後元將嚴實能養士故金之



故老中州之名士多往依之趙天錫爲冠氏  
令嘗延致名儒考論古今先生自甲午至己  
亥在冠氏凡六年皆依天錫以居也

九年丁酉四十八歲

由冠氏歸太原冬復來東平還冠氏

先生興福禪院功德記丁酉之秋見淨文于山陽

蓋自河南歷大名東平訪予而及之

金史地理志  
懷州山陽縣

興定四年置

又蘧然子墓銘予居東州久將還太原行有日蘧  
然子聞之恨相從之不得久也爲之泣數行下丁

酉冬復來東州而蘧然子下世已數月矣其壻商  
挺孟卿爲予言予已北歸蘧然子爲之飲食不美  
者數日

又太原昭禪師語錄引歲丁酉八月余自大名返  
太原

廷堪案是年爲宋理宗嘉熙元年先生以是  
年秋身還太原而家仍留東州故冬復來東  
州也集中讀書山雪中詩云前年望歸歸不  
得去年中途脚無力殘生何意有今年笑兀  
家山墮眼前此詩當作于戊戌之冬所云去

年中途脚無力者卽丁酉反太原之事集中  
又有別覃懷幕府諸君詩過濁漉與趙尚賓  
談山陽舊事詩皆當作于此年先生旣歸至  
冬復來東州而以十二月還冠氏故集中又  
有十二月十六日還冠氏十八日夜雪詩中  
有云千里關河高骨馬蓋自言其往返之勞  
也

十年戊戌四十九歲

夏往東平秋由冠氏挈家歸秀容

先生范鍊師真贊戊戌之夏予過東平留宿正一

宮

又千戶趙侯神道碑予往客平陽者六年歲戊戌  
七月以叔父之命將就養太原侯留連鄭重數月  
不能別軍行河平子與之偕分道新鄉置酒行營  
中夜參半把燭相視不覺流涕之覆面也明日使  
人留語云欲與吾子別而情有所不忍唯有母相  
忘而已

廷堪案集中有戊戌十月山陽雨夜二首詩  
中有云單車我東來塵土滿歸鬢蓋由東平  
歸取道懷州所作也先生以秋八月別冠氏

而張天錫留連鄭重至數月不能別至新鄉  
分道始得就驛故十月仍在懷州山陽耳  
廷堪案集中有戊戌秋八月初二日別冠氏  
諸人詩又有戊戌八月二十二日入濟源寓  
舍詩蓋自冠氏還鄉道中作也考別冠氏諸  
人詩末云分手共傷千里別低眉嘗愧六年  
貧他時細數平原客看到還鄉第幾人先生  
自癸巳北渡至是年始歸故曰六年其出東  
平詩亦云往來空置六年家當亦戊戌所作  
再考先生自貞祐二年甲戌避兵南渡河至  
此凡二十五年而集中初挈家還讀書山詩  
云滄海橫流二十年者舉成數也

十一年已亥五十歲

先生以金之實錄在順天萬戶張柔家乃言于柔願  
爲撰述柔奏上方闢館爲樂夔所阻乃構野史亭于  
家著述其上當是時渾源劉祁因撰崔立功德碑爲  
清議所持乃力以碑文誣先生及王若虛與之共撰  
以分其過樂夔楊宏道曹居一輩皆附和其說先生  
弗之辨也唯于秋夜詩及外家別業上梁文二篇微  
示其意而已後陵川郝經作辨磨甘露碑始爲力白

其誣

金史本傳晚年尤以著作自任以金源氏有天下典章法度幾及漢唐國亡史作已所當任時金國實錄在順天張萬戶家乃言于張願爲撰述旣而爲樂夔所阻而止好問曰不可令一代之跡泯而不傳乃構亭于家著述其上因名曰野史亭凡金源君臣遺言往行採摭所聞有所得輒以寸紙細字爲記錄至百餘萬言今所傳者有中州集及壬辰雜編若干卷纂修金史多本其所著云

郝經先生墓銘國史實錄在順天道萬戶張公府乃言於張公使之聞奏願爲撰述奏可方闢館爲武安樂夔所阻而止

又外家別業上梁文自注予北渡之初獻書中令君請以一寺觀所費養天下名士造謗二三亦書中枚舉之類也

郝經辨磨甘露碑詩國賊反城自爲功萬段不足仍推崇勒文誦德召學士溥南先生副一死林希更不顧名節兄爲起草弟親刻省前便磨甘露碑書丹卽用宰相血百年涵養一塗地父老來看暗流涕數罇黃封幾斛米賣却家聲都不計盜據中

國責金源吠犬極口無覩顏作詩爲告曹聽翁且  
莫獨罪元遺山元史張柔傳柔字德剛易州定興  
人

廷堪案本集己亥元日詩云五十未全老衰  
容新又新漸稀頭上髮別換鏡中人野史纔  
張本山堂未買鄰不成騎瘦馬還更入紅塵  
故以搆野史亭繫之此年集中又有己亥十  
一月十三日雪晴夜半讀書山東龕看月詩  
又倪庄中秋詩自注云己亥

又案金詩紀事云秋夜詩爲汴京之難言之

也金史文藝傳云天興二年崔立之變羣小  
附和請爲立建功德碑翟奕召翰林學士王  
若虛爲文若虛自分必死以理論之奕輩不  
能奪乃召太學生劉祈麻草輩赴省元好問  
張信之喻以立碑事祁等固辭而別數日促  
迫不已祁卽爲草定以副好問好問意未愜  
乃自爲之旣成以示若虛乃共刪定數字則  
當時碑文皆以爲裕之所作其不免于物議  
可知詩中悲銜坯戶冤抱覆盆傷九死之餘  
生慨百年之身世曹聽耳食實繁有徒樽酒

細論所以嘆息于告語之無人也考所引金史出王若虛傳文前本先生內翰王公墓表後本歸潛志此作史者不能決擇牽連采入何可引以爲據且郝陵川詩所謂曹聽翁者卽先生上耶律中書令書中燕人曹居一歸潛志中曹通甫也通甫爲及甫之弟見先生集中所云造謗二三當卽其一今乃云曹聽耳食實繁有徒竟以曹聽二字作曹好曹惡解認爲泛指時人其疏于考訂若此宜乎論先生此事不得其要領也

又案金詩紀事云外家別業上梁文中云左曹之斗食未遷時裕尙官左司都事其後梁王監國始遷左右司員外郎也東道之戈船已御時天興元年春元兵已駐鄭州海灘寺進攻汴京也圍城數月外援莫至奴申乞和訛可出質請罷攻而不得議親捍而大奔車駕蒙塵輿情無主衆欲推立荆王守純以城降元如春秋紀季入齊之義所謂人望荆兄之通好義均紀季之附庸也其時裕之實請于奴申與阿不立監國以全兩宮與皇族翌

日而乃有崔立之變二相被殺故有上書宰相喋血京師存趙有謀哭秦無淚之歎也至云劫太學之名流文鄭人之逆節似乎當時碑文仍出劉京叔手苟如史所云好問意未愜乃自爲之則安得復云蜀家降欵具存李昊之世修趙王禪文何預陸機之手迹耶此論頗爲得之特所見歸潛志僅前八卷未覩足本故不能斷定耳其實碑文爲劉京叔筆蓋文中伊誰受賞卽歸潛志告身三通特賜進士出身及陵川詩數樽黃封幾斛米也於

我嫁名卽歸潛志裕之落筆草其事金史好問意未愜乃自爲之之說也夫當時立碑撰文不過畏崔立之禍非必取文辭之工有京叔屬草已足以塞立之請何取另爲之耶比而觀之論者亦可以了然矣

又案金詩紀事云外家上梁文注中所云中令君蓋耶律楚材也楚材爲文獻公履之第三子仕元爲中書令裕之獻書卽在癸巳歲之四月於金爲天興二年於元爲太宗之五年時汴京變後南中大夫士歸河朔者所在

有之故裕之寓書楚材請以一寺觀費養天下名士也書中所枚舉者自耆舊如馮內翰叔獻梁都運斗南高戶部唐卿王延州從之外時輩為平陽王狀元綱東平王狀元鶚濱人王賁臨淄人李浩秦人張徽楊煥然李庭訓河中李獻卿武安樂夔固安李天翼沛人劉汝翼齊人謝良弼鄭人呂大鵬山西魏璠澤人李恒簡李禹翼燕人張聖俞太原張緯李謙冀致君張耀卿高鳴孟津李蔚真定李冶相人胡德珪易州敬鉉雲中李微中山楊

果東平李彥西華徐世隆濟陽張輔之燕人曹居一王鑄渾源劉祁及其弟郁李全平定賈庭揚楊恕濟南杜仁傑洺水張仲經虞鄉麻草東明商挺漁陽趙著平陽趙維道汝南楊鴻河中張肅河朔勾龍瀛東勝程思溫及其從弟思忠共四十九人內劉麻之名皆在焉然則所云造謗二三得毋即指之耶但裕之與信之素厚內鄉隱居河汾投老終始未嘗有間京叔父子兄弟其始亦極為裕之所推許即晚歲輯中州集時論雲卿蓬門先生



集中詩尚云二子祁郁俱有名于時未聞有  
所譏貶如文中養虺成蛇穀弓射羿何甚也  
然猶稱之曰名流不深斥其人也諉之曰劫  
明其非得已也復爲之解曰命由威制則又  
似乎京叔之撰文翟奕張信之輩實使裕之  
促之者更爲之解曰佞豈願爲又似乎京叔  
屬草旣定之後裕之亦嘗畧爲刪改者後乃  
盡舉其過歸之一人是以悼同聲同氣之間  
有無罪無辜之謗也考先生修史爲樂夔所  
阻劉京叔又引曹通甫詩爲先生撰碑之證

此三人皆書中所枚舉者非卽造謗二三之  
明驗乎若以與京叔兄弟始終無間及中州  
集中論次劉雲卿詩無所譏貶爲疑則所見  
尤淺夫先生著作關乎國史豈肯以一己之  
恩怨紊千古之是非且集中尚有贈荅樂丈  
舜咨及送曹及甫兼及通甫詩而楊叔能亦  
歸潛志中引其所作之詞爲證者先生則并  
爲序其所著小亨集是先生于數人均無所  
介意不獨京叔兄弟也蓋先生所以不死者  
爲國史之故非爲富貴聲譽國史不亡其志

元遺山先生全集 卷下  
已遂皇恤悠悠之口哉然其存心忠厚亦於此可見至于文中命由威制佞豈願爲二句在劫太學之名流文鄭人之逆節下乃原諒京叔之辭與歸潛志爲二親計劇秦美新等語正同文義甚明顯而以爲先生自解其促京叔及刪改京叔之文之語何其慎也益不足深辨已

又案金詩紀事遺山集內翰王公墓表云崔立劫殺宰相送欵行營羣小請爲立建功德碑召公爲文喋血之際翟奕輩恃勢作威公自分必死以理喻之奕輩不能奪竟脅太學生託以京城父老意而爲之則碑文之出于劉京叔可知郝伯常辨磨甘露碑詩中勒文誦德召學士滹南先生副一死謂王從之能顧名節也林希更不顧名節兄爲起草弟親刻豈於時京叔撰文其弟文季亦在圍城中便爲之上石耶書丹卽用宰相血傷奴申阿不之見殺也父老來看暗流涕明非京城父老意也數樽黃封幾斛米卽遺山上梁文所云受賞也賣却家聲都不計當以二劉之高

祖南山翁搆從曾祖西巖老人汲父御史從  
益於金源氏百年以來世爲高門今乃以此  
墮其家聲爲可惜也但林希二字殊不可解  
或以爲麻字之減文爲林信之自號貽溪復  
以貽溪之反語爲希耶信之爲秉彝之孫亦  
有家聲但與詩所云兄弟者不合或卽爲信  
之語以起草讓京叔而以刻石自任耶末云  
作詩爲告曹聽翁且莫獨罪元遺山則所以  
爲裕之訟寃者雖切然未嘗謂不與其事者  
蓋裕之自尚書省椽遷左右司員外郎實爲

崔立所署其受謗亦未爲無因也考伯常詩

中林希更不顧名節句係用宋林希名節掃

地語

見宋志  
林希傳

以喻京叔並無深文乃穿鑿附

會以麻信之當之誤矣又謂先生左右司員  
外郎爲崔立所署受謗不爲無因則尤誤史  
稱凡除拜皆以監國爲辭安得謂崔立所署  
若然則陶潛之建威參軍不得爲晉處士管  
寧之大中大夫不得爲漢逸民耶且伯常此  
詩原爲白先生之寃而作故首冠以辨字幾  
於大聲疾呼今乃曲爲之解謂有微辭則不

獨誣先生並誣伯常矣烏可乎再詩中兄爲  
起草弟爲刻句亦與歸潛志異志云工書人  
張君庸

又案天興二年正月哀宗戰于衛州敗績夜  
登舟東幸歸德故上梁文云東道之戈船已  
御也紀事謂指元兵駐鄭州殊誤鄭州在汴  
西非東也

十二年庚子五十一歲

家居秀容

廷堪案集中有庚子三月十日作詩一首又

有杏花詩二首自注庚子歲南庵賦

十三年辛丑五十二歲

客東平行臺嚴忠濟家

先生故帥閻侯墓碑辛丑元日子方客東平載之  
盛爲具召余及大興張聖與祈人宋文卿東光勾  
龍英孺鎮人劉子新太原崔君卿渾源劉文季壽  
春田仲德輩飲于家之養素堂

廷堪案忠濟嚴實之次子襲實職者實以庚  
子四月卒官以五月葬旣葬三月忠濟請先  
生爲神道碑見先生東平行臺嚴公神道碑

則先生庚子秋已至東平也集中秋夕詩云  
頻年但覺貂裘敝萬古何曾馬角生寄食且  
依巖尹幕寄書誰往鄧州城疑係庚子秋來  
春四東平所作閻侯墓碑云辛丑元日子方客東  
平距實之已十月矣閻侯名珍上黨人見  
先生所作墓表張聖與郭子宮全金詩云爵  
里無考見續夷堅志據此則聖與當爲大興  
人蓋遼之世族也集中雲巖詩序稱聖與三  
世相家以文章名海內

又案是年爲宋理宗淳祐元年其年十一月

蒙古太祖殂于和林行殿

壬寅五年五十三歲

間居秀容錄元氏集驗方

先生元氏集驗方序予家舊所藏多醫書往往出  
於先世手澤壬寅冬間居州里因錄余所親驗者  
爲一編目之曰集驗方

廷堪案集中有晨起七律一首自注壬寅正  
月九日又有感興七律自注夜宿讀書山作  
詩末云五十三年等閑裏一窗風葉雨瀟瀟  
當亦壬寅間居所作故有晚似馮公豈見招

之句先生蓋以惓惓故國爲時所忌而甘自  
屏棄讀此可以見其志矣

又案是年春太宗昭慈皇后乃馬真氏稱制  
攝國者五年元史不紀年但書千支今從之

癸卯年五十四歲

客燕冬還鄉復往燕

先生臨錦堂記燕城自唐季及遼爲名都金朝貞  
元迄大安又以天下之力培植之物產豐潤與趙  
魏無異六飛旣南禁鑰隨廢比焦土之變其物華  
天寶所以濟宮掖之勝者固以散落人間矣御苑

之西有地焉深寂古澹有人外之趣稍增築之則  
可以坐得西山之起伏幕府劉公子栽其西北隅  
爲小圃引金溝之水渠而沼之竹樹葱蒨行布棊  
列嘉花珍果靈峯湖玉往往而在焉堂於其中名  
之曰臨錦癸卯八月公子觴余此堂坐客皆天下  
之選

慎言  
補

又朝列大夫同知河間府君張君墓表歲癸卯秋  
九月某客燕中

又通予大師李君墓表癸卯冬予自燕都還大原  
道出范陽

又曹徵君墓表壬辰之兵君流寓宏州癸卯冬予  
自新興將之燕中乃枉道過之

又太古堂銘癸卯冬予自燕都南歸鍊師館余于  
慶源道院

又荅中書成仲書癸卯之冬蓋嘗從來使一到燕  
中

廷堪案集中有病中五律自注癸卯四月二  
十一日晨起書又有癸卯歲杏花雜言詩中  
云讀書山前二月尾向陽杏花未全開蓋先  
生春夏間猶家居也癸卯望宿中霍道院七

律亦當作于是年之春故詩中有湖山已爲  
新晴好風露還疑此夜添之句又雜言水簾  
記異自注癸卯九月四日同杜仲梁賦洪谷  
自注聖燈詩自注九月五日作二詩疑皆往燕取  
道太行所作

甲辰年五十五歲

春自燕雲歸夏至崞縣秋往河南

先生壽陽縣學記甲辰之春予歸自燕雲道壽縣

先生兩山行記甲辰夏五月八日子以事當至崞

縣

又廣威將軍郭公墓表甲辰冬予過洛西

廷堪案集中有甲辰三月一日以後雜詩七

律三首甲辰夏五月積雨十餘日不止遣悶

五律三首甲辰秋留別丹陽七律一首丹陽

謂丹水之陽似先生是年又之內鄉矣

乙巳年五十六歲

自河南扶母張夫人櫬歸秀容秋往崞縣游崞山祠

得王無競崞山神三字刻之石冬以營葬事往東平

過張聖與賦雲巖詩因往曲阜拜孔氏林廟

先生與樞判白兄書自乙巳歲往河南舉先夫人

旅殯首尾閱十月之久幾落賊手者屢矣狼狽北

來復以葬事往東平連三年不寧居

又王無競題名記安陽王尚書無競天眷中以文

章顯凡燕遼汴梁宮殿題榜如大安大慶應天承

天之等皆其筆也趙閑閑言無競他書未必過人

至于尋丈大字盤之筆勢如作小楷自當為古今

第一乙未秋余與梁辨疑李輔之武伯佐游崞山

祠得無競崞山神三字乃託好事者刻之石以傳

不朽八月十有一日新興元某記

慎言補

又雲巖詩序觀州倅武伯英崞縣人少日舉進士



有詩名家故饒財第宅園林爲河東之冠貯書有  
萬卷樓爲人多伎巧嘗得宣和湖石一窾竅穿漏  
殆若神劉鬼鑿炷香其下則烟氣四起散布槩水  
上濃淡縈拂有煙江疊嶂之韻伯英恃寶石以擅  
奇汾晉間興定末伯英歿于關中楊戶部叔玉購  
石得之壬辰圍城中以示余且命作詩危急存亡  
之際不暇及也乙巳冬十一月來東平過聖與張  
君之新軒而此石在焉聖與名之曰雲巖予問石  
所從來聖與言夏津王帥得之汴梁泥塗中以見  
貽

又手植檜聖像贊乙巳冬十二月拜林廟還得手

植檜把握就刻之爲宣聖顏孟十哲像

慎言補

廷堪案張夫人歿在正大六年至是年乙巳

凡十七年所云旅殯蓋內鄉也

又案集中有乙巳九月十八日作詩

定宗元年丙午五十七歲

自東平歸過彰德

先生朝散大夫同知東平府事胡公神道碑歲丙

午某過彰德

二年丁未五十八歲

家居秀容

先生藏雲先生袁君墓表丁未芮城李邦彥過吾州

又朝元觀記歲丁未春二月梁鍊師辨疑過新興踵門爲余言

廷堪案集中有丁未寒食歸自三泉詩

三年戊申五十九歲

廷堪案是年三月定宗崩定宗欽叔皇后斡兀去海迷失氏臨朝稱制先後議所立未決三歲無君元史不紀年但書干支今從之

己酉年六十歲

中州集成龍山趙國寶爲鋟木張德輝爲作後序是年九月復往燕冬還秀容

張德輝中州集後序遺山北渡後網羅遺逸以纂集爲事歷二十寒暑僅成卷帙己酉秋得真定提舉龍山趙國寶資藉之始鋟木以傳

先生信武曹君阡表己酉秋九月予以事來燕都又毛氏家訓後跋語己酉冬某自燕還

又楊叔能小亨集引今年其所撰小亨集成其子復見子鎮州以集引爲請云云己酉秋八月初吉

河東元某序

廷堪案金史本傳云有中州集壬辰雜編若干卷纂修金史多本其所著又歐陽元圭齋集送振先宗丈歸祖庭詩小序云近年奉詔修三史於翰林故府中攜金人遺書得元遺裕之手寫壬辰雜編一帙然則金史之成多本于先生二書可知中州集成于是年壬辰雜編已佚不知成于何時竊謂先生以史自任故天興顛沛之際猶請以小字書國史一本隨駕蓋綜金源一代而論收國之平遼天輔之滅宋征伐之功不可泯也天眷之守成正隆之好大治亂之跡不可沒也大定之深仁厚澤比于堯舜明昌之典章制度幾及漢唐尤先生所惓惓不忘者也至于貞祐南遷汴以來學士大夫風雅相尚山林韋布文章自雄迨夫戈船東狩旃車北渡國君殉社稷烈士死封疆疾風勁草觸處生悲皆先生所目覩而身罹者國可亡史不可亡身可死史不可死所以奔走間關終身不受升斗之祿不過欲以此身存百年之掌故而已向使奉

詔開館之日羣小不阻則網羅散佚搜采舊聞其所成之書當必明備詳覈鬱爲大觀豈脫脫歐陽元輩所可及哉然金源一代文獻卒賴野史亭紀載之力令後人猶可攷雖謂先生纂述之功與完顏彝之死綏張天綱之不屈爭烈可也再考先生構野史亭在己亥至是僅十一年北渡在癸巳歲至是亦僅十七年張德輝後序言歷二十寒暑者蓋約計之也

又案集中有己酉四月十七日度石嶺詩其邢州新石橋記亦當作於是年記云命里人郭生立準計工郭生卽郭守敬也齊履謙知大史院郭公行狀云公諱守敬字若思順德邢臺人先是順德城北有石橋以通達活泉水兵後橋爲泥潦淤沒失其所在公甫冠審地形按指其處而得之河東元裕之文其事于石則記所云郭生之卽爲守敬審矣守敬卒于元仁宗延祐三年丙辰年八十六其甫弱冠當在是年守敬水利律數及儀象制度之學稱爲一代偉人而少時蒙先生一語之

元遺山先生年譜 卷下  
稱作行狀者且據之以爲榮則先生之在當時其聲望爲何如也

庚戌年六十一歲

往順天

先生順天府營建記庚戌秋七月予過順天

廷堪案先生順天之行當爲之張柔家觀金實錄也先生與樞判白兄書云向前八月大葬之後惟有實錄一件只消親去順天府一遭破三數月功披節每朝終始及大政大善惡係朝廷興廢存亡者爲一書大安及正大

事則畧補之此書成雖溘死道邊無恨矣是先生之往順天志已萌于甲辰至此年乃遂耳

蒙古憲宗元年辛亥六十二歲

家居秀容夏以事至太原秋往真定

先生題閑閑書赤壁賦後辛亥夏五月以事來太原

又真定府學教授常君墓銘歲辛亥晦自太原東來過仲明之門

廷堪案集中有辛亥寒食詩

二年壬子六十三歲

在真定與東平張德輝北觀世祖于潛邸

先生東平行臺嚴公祠堂碑銘壬子冬公之嗣子

某走書幣及好問于鎮陽

又東平賈氏千秋錄後記壬子冬十月自真定來

東原

又贈蕭漢傑詩序蕭漢傑大興人金初嘗賜姓奧

里氏故時人又謂之奧里漢傑從軍二十年積官

從三品燕城圍解之後間關南渡鐵嶺之潰復入

陝州陝州亂羣不逞繫漢傑獄中漢傑破械而出

為失侯故將者又二十年壬子冬與余相值于東

原問其世知其為故人大鈞之同母弟也

又遊承天懸泉詩

此詩無錫華氏本失載

自注趙閑閑公守

平定以大安庚午來遊迄今壬子四十二年矣

元史張德輝傳德輝字輝卿冀寧交城人金亡北

渡史天澤開府真定辟為經歷官世祖在潛邸訪

中國人材德輝舉魏蟠元裕李冶等二十餘人壬

子德輝與元裕北覲請世祖為儒教大宗師世祖

悅而受之

廷堪案集中有壬子冬至新軒張元聖與求

爲兒子阿平制名詩壬子月夕詩二詩皆當  
在東平作聖與家在東平而月夕詩末云遙  
憐小兒女把酒則憶東州則先生時在東平  
也

又案先生身爲金源遺老而往見元世祖于  
潛邸者亦許魯齋不如是則道不行之義也  
許魯齋不仕金故受官而不辭先生仕金故  
往見而不受祿出處之道易地皆然夫振鷺  
來雍明夷陳範古人固已有之

又案漢傑賜姓奧里氏郭氏全金詩云按金

國語解無奧里姓氏諸人事物類亦無此稱  
考金史王回離保傳贊曰奚有五大定間類  
族著姓有遙里氏伯德氏奧里氏梅知氏揣  
氏是金有奧里氏矣但國語解未之載耳  
又案先生自癸巳北渡後戊戌始歸秀容中  
間或在冠氏或在東平或在順天或在河南  
或在燕或在真定或在秀容行踪無常最難  
考定徐世隆所謂周流乎齊魯燕趙晉魏之  
間幾三十年者是也其在冠氏者主張天錫  
家在東平者主巖實父子在順天者爲國史

元遺山先生年譜 卷下  
事主張柔家在真定者主張德輝家獨在河  
南爲扶櫬事不知誰主

三年癸丑六十四歲

以事至燕冬應嚴忠濟召往東平

先生致樂堂記癸丑之夏余以事來故都

又王黃華墓碑癸丑夏六月某客燕中

又宣武將軍孫君墓銘癸丑之冬予以行臺之召

東來

廷堪案集中送崔夢臣北上詩序云癸丑二  
月望日新興元某序詩作于二月則先生是

時當仍在東平也又有題張彥寶陵川西溪

圖自注癸丑十一月三日題

又案題年爲宋理宗寶祐元年

四年甲寅六十五歲

自東平往真定秋還太原仍往真定冬十二月還太

原

先生嵩和尚頌序歲甲寅秋七月余自清涼還太

原

廷堪案先生集中有甲寅正月二十三日故  
關道中詩詩首云六十復丰十年年添白頭



末云殷勤行記上今日在東州則先生似以  
正月發東平往真定也又臺山雜咏十六首  
自注甲寅六月則先生還太原在秋而發真  
定則于季夏也集中又有甲寅九月同臨漳  
提領王明之鹿泉令張奉先賈千戶令春李  
進之冀衡甫遊龍泉寺僧顛求詩詩是先生  
及太原未幾又復來真定又甲寅十二月四  
日出鎮陽寄宰魯伯詩是冬又由真定歸也  
五年乙卯六十六歲  
春往汴梁由汴梁之真定秋往東平冬又往真定

先生七絕題乙卯二月二十一日歸自汴梁二十  
五日夜久旱而雨偶記內鄉一詩追錄於此今三  
十年矣

又濮州刺史畢侯神道碑銘乙卯秋八月予來自  
鎮陽東平參佐王君璋以畢侯之子來

廷堪案集中有乙卯十一月往鎮州詩故知  
是年冬先生自東平往真定也集中又有乙  
卯端四日感懷詩

六年丙辰六十七歲

在真定獲鹿

先生故廉訪使楊公神道碑丙辰冬十月子閒居  
西山鹿泉

廷堪案集中有丙辰九月二十六日挈家遊  
龍泉詩蓋先生是時攜家在獲鹿也集中又  
有獲鹿新居七古二十四韻

七年丁巳六十八歲

七月將西歸不果遂於九月四日卒於真定獲鹿寓  
舍歸葬于秀容陵川郝經銘其墓所著有杜詩學東  
坡詩雅錦機詩文自警等集又有中州集壬辰雜編  
金源君臣言行錄等書

金史本傳年六十八卒有中州集壬辰雜編若干  
卷

郝經先生墓銘歲丁巳秋九月四日遺山先生卒  
于獲鹿寓舍經走常山三百里爇文酌酒哭于畫  
像之前

又某年月日葬于秀容之先塋

又當德陵之末獨以詩鳴上薄風雅中規李杜粹  
然出于正直配蘇黃氏天才清贍邃婉高古沉鬱  
太和力出意外巧縛而不見斧鑿新麗而絕去浮  
靡造微而神采煥發雜弄金碧揉飾丹素奇芬異

秀洞蕩心魄看花把酒歌謠跌宕挾幽并之氣高  
視一世五言以雅爲正出奇于長句雜言至千五  
百餘篇爲古樂府不用古題特出新意以寫怨思  
者有百餘篇用今題爲樂府揄揚新聲者又數十  
百篇皆近古所未見者也汴梁也故老皆盡先生  
遂爲一代宗匠以文章獨步幾三十年銘天下功  
德者盡趨其門有例有法有宗有趣又至百餘首  
爲杜詩學東坡詩雅錦機詩文自警等集指授學  
者方吾道壞爛文耀暄昧先生獨能振而鼓之揭  
光于天俾學者歸仰識詩文之正而傳其命脉繫

而不絕其有功于世又大也爲中州集百餘卷又  
爲金源君臣言行錄往來四方採摭遺逸有所得  
輒以寸紙細字親爲記錄雖甚醉不忘于是雜錄  
近世事至百餘萬言捆束委積塞屋數楹名之曰  
野史亭書未就而卒嗚呼先生可謂忠矣

徐世隆先生文集序金百年來得文派之正而主  
盟一時者大定明昌則承旨党公貞祐正大則禮  
部趙公北渡則遺山先生一人而已

廷堪案集中有張村杏花詩自注丁巳三月  
初二日又集中有病中感寓贈徐威卿兼簡

曹益甫高聖舉詩蓋先生絕筆也

又案徐世隆先生集序云東平嚴侯弟忠傑喜與士人遊雅敬遺山永其完集刊布以大其傳又李治序云東平嚴侯弟忠傑有文如淇澳好善如干旄獨能求其全編將鏡之梓且西走書數百里命余序引考忠傑爲嚴實之子忠濟之弟刻先生遺集在元世祖中統三年距先生之歿方六年蓋先生北渡後設館授餐買山投老伴得肆力于編纂後并爲刊布遺書雖趙天錫張德輝等分任而嚴氏

父子實始終其事云今先生詩文全集無錫華氏有刊本詩集及中州集常熟毛氏有刊本壬辰雜編或云已佚偃師武虛谷進士

億

嘗與余言朱竹君學士有此書戊申冬詢之

朱少白同年

錫庚

云幼時見家有藏本亦不

知其確否也興化任幼植禮部

大椿

云聞江

南藏書家尙有之而未之見當再覓之

又案後三年庚申世祖卽位建元曰中統辛未始改國號曰元

右年元遺山年譜一帙歛凌次仲先生所作也  
先生論詩于唐宋後推遺山爲大宗而以其  
惓惓故國留未亾之身思爲金源存一代文  
獻尤欽其品擬之于漢管甯晉陶潛是編意  
在發幽故自金明昌唐成遺山初生迄蒙古  
憲宗丁巳遺山之歿首尾六十八年據其出  
處行踪分年編次而於崔立功德碑事辨之  
尤力然今以遺山詩文全集勘之亦多所漏  
脫遺山少出嗣叔父格格攜之宦遊四方年  
十八時曾一歸里二十時以秋試往咸秦及

格卒于隴城遺山歸又嘗住太原學舍今篇  
中皆不一及至北渡後身爲羈臣客冠氏者  
六載以戊戌之秋盡室返秀容而丁酉先身  
自返太原其歸後往來東平真定燕都席不  
暇暖中間嘗由東平謁孔氏林廟此事之不  
可不書者篇中亦畧之先生以嘉慶元年官  
吾郡教授歷八年始丁內難歸宣城張綱齋  
其錦從之遊最久先生歸道山後其遺書綱  
齋收藏維謹綱齋編先生年譜稱是書草創  
于乾隆辛丑而成于嘉慶丙辰凡閱十五歲

而始脫稿則先生之于是書不可謂不盡心  
矣猶疎畧如此不解何故年譜云書成作序  
而此本無序又云嘉慶庚申翁覃溪先生寄  
新刻所著遺山年譜一卷先生謂其錦曰吾  
向會以所撰初稿見覃溪師遂蒙教育今師  
亦成此謹錄數條載入吾書而此本不載覃  
溪語先生自序載在校禮堂文集云釐爲一  
卷而此本尚未分卷于原本上復多所塗乙  
又雜抄遺山詩文之紀年者于上方而先後  
雜糅絕無部次然則此殆先生未定之稿歟

其繫湧金亭詩于貞祐丙子而云癸卯在京師覃溪師曾以此詩石刻見示皆原六所無而後增入之者篇末又有戊申冬訪朱少白同年語戊申下距丙辰凡九年上距辛丑凡八年蓋亦累經刪易而仍未敢自以爲不可增減蓋其慎也同鄉潘芸閣少宰爲諸生時常受業于先生得是稿于綱齋之子不忍先生手澤之湮屬余爲披錄清本將壽之梓余因取金元史暨遺山集參稽互考就先生所塗乙節抄者逐年排比間亦爲之補所未備

至遺山之姪搏此本作傳而據本集河南元公墓銘<sup>以</sup>爲搏然無錫華氏本實作搏不知先生所據誤本爲何人所刻今亦姑仍之庶幾異日得定本不至大相違戾云道光己酉十一月二十八日涇包慎言跋



